

PRIMERA CARTA DEL APOSTOL SAN JUAN

Ñee tecove opa mbae vae omee vae

¹ Roicuatía roi peve jocuae Ñee tecove opa mbae vae omee vae regua. Jae jecuaeño oico ndei iví oyeapo mbove. Jare ore roendu jocuae Ñee. Roecha cavi. Romae jese. Royavíqui vi orepo pe etei. ² Jocuae Ñee tecove opa mbae vae etei co. Romombeu peve quirai ore etei roecha. Roicuaucu peve jae co tecove opa mbae vae. Jae jecuaeño oico ñandeRu Tumpa ndive ndei iví oyeapo mbove, erei ou oyecuaa oreve. ³ Romombeu peve roecha jare roendu vae, pe reta vi peñemoiru vaera ore ndive. Añetete ñañemoiru ma ñandeRu Tumpa jare Tai Jesucristo ndive. ⁴ Jare cuae mbaembae regua roicuatía peve peyerovia yae vaera.

Tumpa oico tembipe oia pe

⁵ Romombeu peve ñee Jesucristo omombeu oreve vae. Jae co cuae: Tumpa oico tembipe oia pe. Mbaeti etei oico pitumimbi oia pe. ⁶ Güiramoi yae ñañemoiru ma co jae ndive. Ereí yaico yave pitumimbi oia pe yogüireco vae rami, ñandeapu co. Mbaeti co yaico añete vae rupi. ⁷ Ereí yaico yave tembipe oia pe yogüireco vae rami - echa Tumpa vi oico tembipe oia pe - ñañemoiru oyoupi, jare Jesucristo jugüí ñandeyoe opaete ñanembaeyoa reta güi. Jesucristo co jae Tumpa Tai.

8 Yae yave mbaeti co ñandeyoa, ñañembotavi co. Mbaeti etei co yae añete vae. **9** Ñamombeu yave Tumpa pe ñanembayo reta, ñandepuere yarovia catu Tumpa iñiro vaera ñandeve ñanembayo reta re, jae jupi rambue. Jae ñandeyoeta co opaete jupi mbae vae yayapo vae güi. **10** Yae yave mbaeti co yayapo mbaeyoa, Tumpa iñee mbaeti oico ñandepia pe. Echa Tumpa jei yayapo co mbaeyoa. Jae rambue mbaeti yave yayapo mbaeyoa, Tumpa iyaputa tei co.

2

Cristo oyerure Tumpa pe ñanderé

1 Cheraí reta, aicuatía cuae mbaembae regua peve agüiye vaera peyoa. Erei ñandeyoa yave, oime co quia oyerure ñanderu Tumpa pe ñanderé vae. Jae co Jesucristo. Jae co jupi vae. **2** Tumpa oiporaraucata tei ñandeve ñanembayo reta jeco pegua. Erei Jesucristo oiporara ñanderecovia pe, agüiye vaera Tumpa pochi ñandeve. Jare Jesucristo omano opaete ivi pegua reta imbaeyoa reta re, mbaeti ñanembayo reta reño.

3 Jesucristo iporoócuai reta yayapo yave, cuae oicuaucia ñandeve yaicuaa co. **4** Oime yave quia, Aicuaa co Jesucristo, jei vae, iyapu co mbaeti yave oyapo Jesucristo iporoócuai reta. Jocuae nunga mbaeti jei añete vae. **5** Erei Jesucristo jeigüe oyapo vae añetete oaiu yae Tumpa. Jare yaaíu yave Tumpa, yaicuaa ñande co jae Jesucristo imbae reta. **6** Oime yave quia, Che co jae Cristo imbae, jei vae, toico cavi Jesucristo oico rami.

Mboroócuai ipiau vae

⁷ Cheriví reta, cuae aicuatía ai peve vae mbaeti co mboroočuai ipiau vae. Jaeño metei mboroočuai indechi vae iyipi güive peicuaa vae. Cuae mboroočuai indechi vae co jae ñee peendu iyipi güive vae. ⁸ Erei cuae mboroočuai jecuaeño ipiau. Jare cuae añete Jesucristo peguara jare peveguara vi. Echa pitumimbi oasa ma jare tembipe añetete vae oesape oi.

⁹ Oime yave quia, Che aico tembipe oia pe, jei vae, erei omotarei yave iru oporogüirovia vae, jecuae oico pitumimbi oia pe. ¹⁰ Oime yave quia iru oporogüirovia vae oaiu vae, jae jecuaeño oico tembipe oia pe. Jae rambue ipuere oecha cavi oguata cavi vaera oyeyuca mbae reve. ¹¹ Erei oime yave quia iru oporogüirovia vae omotarei vae, jae jecuaeño oico pitumimbi oia pe. Jae rambue jae co oguata ojo pitumimbi pe vae rami. Mbaeti oicuaa quetí ra ojo. Echa mbaeti etei ipuere oecha pitumimbi pe.

¹² Aicuatía corai peve, cheraí reta, Tumpa iñiro peve pembaeyoa reta re rambue. Iñiro ma peve Jesucristo jee re. ¹³ Tae ocuacuaagüe reta pe cuae: Aicuatía corai peve peicuaa Jesucristo rambue. Jae jecuaeño oico ndei ivi oyeapo mbove. Tae taírusu reta pe cuae: Aicuatía corai peve pemoomiriaña guasu rambue. Aicuatía corai peve, cheraí reta, peicuaa ñandeRu Tumpa rambue.

¹⁴ Tae ye ocuacuaagüe reta pe cuae: Aicuatía corai peve peicuaa Jesucristo rambue. Jae jecuaeño oico ndei ivi oyeapo mbove. Tae ye taírusu reta pe cuae: Aicuatía corai peve pepirata peporogüirovia re rambue, jare Tumpa iñee oico

pepia pe rambue, jare pemoamiri aña guasu rambue.

¹⁵ Agüiye peaiu cuae ivi pegua. Agüiye peaiu mbaembae ivi pe ñogüinói vae. Oime yave quia cuae ivi pegua oaiu vae, mbaeti añetete oaiu Tumpa. ¹⁶ Cuae ivi pegua oaiu vae reta jecuaeñó yogüireco jemimbota reño jare oipota opaete mbaembae ipora vae oecha vae, jare oñemboete yae. Erei opaete cuae ivi pegua co. Mbaeti co ñandeRu Tumpa pegua. ¹⁷ Jare cuae ivi pegua opata co. Jare opa ma yave, ngaraa quia oipota ye. Erei Tumpa jemimbota oyapo vae oicota jecuaeue aveiñó.

Cristo ndive oyovaicho vae

¹⁸ Cheraí reta, ou ma ovae ara taicuegua reta. Peendo quirai Cristo ndive oyovaicho vae outa co. Erei añave oime ñogüinói jeta Cristo ndive oyovaicho vae reta. Jae rambue yaicuaa ou ma co ovae ara taicuegua reta. ¹⁹ Jae reta oñemboyao ñande güi, mbaeti añetete oñemoiru ñande ndive rambue. Echa añetete oñemoiru yave ñande ndive, jecuae oñemboatita tei ñande ndive. Erei oñemboyao reta ñande güi, oyecuaa vaera mbaeti co añetete oñemoiru ñande ndive.

²⁰ Erei Espíritu Santo ou ma pepia pe. Jae rambue pe reta peicuaa opaete. ²¹ Aicuatía peve peicuaa añete vae rambue. Cuae amombeu peve vae mbaeti co mbae añete vae mbaeti peicuaa vae. Jare peicuaa quirai metei apu mbaeti co añete vae pegua.

²² Oime yave quia, Jesús mbaeti co jae Cristo, jei vae, jae co metei iyapu vae. Oime yave quia mbaeti güirovia ñandeRu Tumpa jare Tai re vae, jae

co Cristo ndive oyovaicho vae. ²³ Oime yave quia mbaeti güirovia Tumpa Tai re vae, jae mbaeti etei oicuaa ñandeRu Tumpa. Erei güirovia Tumpa Tai re vae oicuaa co ñandeRu Tumpa.

²⁴ Jae rambue jecuae perovia iyipi güive peñemboe jese vae. Echa jocorai yave, jecuae peñemoiru cavita Tumpa Tai ndive jare ñandeRu Tumpa ndive vi. ²⁵ Jare Tumpa omee ma ñandeve metei morogüirocuavee. Echa güirocuavee omeeta co ñandeve tecove opa mbae vae.

²⁶ Corai aicuatía ma peve, amombeu vaera peve jocuae oipota pemombia vaera Tumpa güi vae reta. ²⁷ Erei Tumpa omee ma peve Espíritu Santo, jare jae oico pepia pe. Jae rambue peicuaa ma cuae regua iru vae omombeu peve mbae reve. Echa Espíritu Santo pemboe opaete mbaembae re, jare Espíritu Santo jecuaeño jei añete vae. Mbaeti etei ipuere iyapu. Jae rambue jecuae peñemoiru Jesucristo ndive Espíritu Santo pemboe rami.

²⁸ Añave, cheraí reta, peñemoatangatu peñemoiru vaera Jesucristo ndive. Jocorai yave, jae ou ye yave, ñaita jae jóvai yayerovia reve. Ngaraa ñanemara jae ndive ñañoovaiti yave. ²⁹ Peicuaa quirai Tumpa co jae jupi vae. Jae rambue peicuaa vi quirai Tumpa omee ma tecove opa mbae vae opaete jupi vae oyapo vae reta pe.

3

Tumpa tai reta

¹ Mase, ñandeRu Tumpa ñanembojee jae tai reta. Cuae oicuaucha ñandeve quirai ñandeRu Tumpa ñanderaiu yae. Jae rambue oporogüirovia mbae

vae reta mbaeti ñandecuaa cavi, mbaeti oicuaa cavi Tumpa rambue. ² Cheriví reta, añave ñande co jae Tumpa tai reta. Jare Tumpa ndeiño oicauaca ñandeve quiraita ra ñai. Erei yaicuaa ñaita co Cristo rami jae ou ye yave. Echa yaecha cavita. Jae etei oita ñanderóvai. ³ Jare oime yave quia oaro oi oyerovia reve oecha vaera vae, jae oipota yae oico iyoa mbae reve. Echa Cristo iyoa mbae vae co.

⁴ Oime yave quia mbaeyoa oyapo vae, jae oyaví Tumpa iporoócuai. Echa iyoa vae oyaví Tumpa iporoócuai. ⁵ Jare peicuaa quirai Jesucristo oyeapo cuimbaera omboai vaera ñanembeya reta. Jare jae mbaeti etei iyoa. ⁶ Oime yave quia oñemoiru Jesucristo ndive vae, jae mbaeti jecuaeño oipota iyoa. Jecuaeño oipota iyoa vae mbaeti co Jesucristo imbae. Mbaeti etei oicuaa Jesucristo.

⁷ Cheraí reta, agüiye quia tapembotaví. Jesucristo jipi co. Jae ramiño vi jipi vae oyapo vae jipi co. ⁸ Jecuaeño mbaeyoa oyapo vae aña guasu imbae co. Echa aña guasu jecuaeño iyoa iyipi güive. Jare Tumpa Tai oyeapo cuimbaera omboai vaera aña guasu iparavíqui.

⁹ Tumpa güi tecove opa mbae vae güinoi vae mbaeti jecuaeño oyapo mbaeyoa. Echa güinoi ma tecove Tumpa güi. Jae rambue mbaeti ipuere jecuaeño oyapo mbaeyoa. Echa oime ma güinoi tecove opa mbae vae Tumpa güi. ¹⁰ Jare ñandepuere yaicuaa quia ra co jae Tumpa tai reta jare quia ra co jae aña guasu tai reta. Oime yave quia jipi vae mbaeti oyapo vae, jae mbaeti co Tumpa imbae. Jae ramiño vi oime yave quia iru oporogüirovia vae mbaeti oaiu vae, jae mbaeti co Tumpa imbae.

11 Echa iyipi güive peendu cuae ñee: Yayoaiu.
12 Agüiye yayapo Caín oyapo rami. Echa Caín aña guasu imbae co jare oyuca tivi. Jare peicuaa co maera oyuca. Caín oyapo icavi mbae vae, jare tivi oyapo jupi vae. Jae rambue Caín oyuca tivi.

13 Agüiye pepiacañi, cherivi reta, oporogüirovia mbae vae reta pemotarei yave. **14** Ñande yaicuaa yaasa ma co mano güi tecove opa mbae vae pe, iru oporogüirovia vae reta yaaíu rambue. Iru oporogüirovia vae mbaeti oaíu vae mbaeti güinoi tecove opa mbae vae. **15** Oime yave quia iru oporogüirovia vae omotarei vae, jae metei oporoyuca vae rami co. Jare peicuaa quirai metei oporoyuca vae mbaeti etei güinoi tecove opa mbae vae. **16** Jesucristo etei oicuaucha ñandeve Tumpa iporoaiu. Echa omano ñanderé. Jae ramíño vi icavi co ñande ñamano vaera iru oporogüirovia vae reta re. **17** Ereí oime yave quia mbaembæ ivi pegua re oicocatu vae, jare oime yave oporogüirovia vae mbaembæ oata chupe vae, jocuae oicocatu vae ñatei yave ombori mbaembæ oata chupe vae, jae mbaeti güinoi Tumpa iporoaiu ipia pe. **18** Cheraí reta, añetete yaaiu yave iru vae, yayapota mbae ñambori vaera. Ngaraa ñanemiarieño ñandeporogüirovia re.

19-20 Corai yaicuaata yaico co añete vae re, jare yepe tei ñañemboeco mbae re ñandepia pe, ereí ñandepiacatuta Tumpa jovaque. Echa Tumpa oicuaajeta yae opaete ñande yaicuaa vae güi. Tumpa oicuaa opaete. **21** Cherivi reta, mbaeti yave ñañemboeco ñandepia pe, jecuaeño ñandepuere yaya Tumpa re yaquiyembae reve. **22** Jare

yayerure yave Tumpa pe mbae re, jae omeeta ñandeve, yayapo iporoócuai reta rambue. Echa jocuae yayapo vae omboyerovia Tumpa. ²³ Jare Tumpa jei ñandeve yarovia vaera Tai Jesucristo jee re jare yayoaiu vaera. Jae co mborooócuai Tumpa omombeu ñandeve vae. ²⁴ Jare Tumpa iporoócuai reta oyapo vae oñemoiru Tumpa ndive, jare Tumpa oñemoiru jae ndive. Jare yaicuaa Tumpa oñemoiru co ñande ndive. Echa Tumpa omee ñandeve Espíritu Santo oico vaera ñandepia pe.

4

Ñee oyoavi vae reta

¹ Cheriví reta, oime cuae ivi pejeta oporombotaví vae reta. Jae reta jei iyapu reve: Che co jae metei Tumpa iñee omombeu vae. Jae rambue peñemongueta cavi peendu vae re, agüiye vaera perovia ñee mbaeti Tumpa güi ou vae. ² Ñandepuere yaicuaa ou ra ñee Tumpa iEspíritu güi. Echa ñee omombeu peve vae jei yave Jesús co jae Cristo cuimbaera oyeapo vae, jocuae ñee ou Tumpa güi. ³ Erei ñee omombeu peve vae mbaeti yave jei Jesús co jae Cristo, jocuae ñee mbaeti ou Tumpa güi. Jocuae oporombotaví vae oyovaicho Cristo ndive. Echa peendu quirai Cristo ndive oyovaicho vae reta yogüeruta co. Jare oime ma ñogüinói ivi pe.

⁴ Cheraí reta, pe reta co jae Tumpa imbae reta, jare pemoamiri ma Cristo ndive oyovaicho vae reta. Echa Espíritu Santo oico pepia pe jare jae imbaepuere tuicha yae ivi pegua reta

iya imbaepuere güi. ⁵ Echa jae reta ivi pegua co. Jae rambue imiari mbaembae ivi pegua re, jare oporogüirovia mbae vae reta oyeapisaca cavi jese reta. ⁶ Erei ñande co jae Tumpa imbae reta. Oime yave quia oicuaa Tumpa vae, jae oyeapisaca ñanderé. Erei oime yave quia mbaeti co Tumpa imbae vae, jae mbaeti oyeapisaca ñanderé. Jare corai yaicuaa añete vae pegua ra metei ñee, ani tavi pegua ra.

Tumpa mboroaiu etei co

⁷ Cherivi reta, yayoaiu. Echa Tumpa omee ñandeve mboroaiu. Jare oporoaiu vae ñavo güinoi tecove opa mbae vae Tumpa güi, jare oicuaa Tumpa. ⁸ Mbaeti oporoaiu vae mbaeti oicuaa Tumpa. Echa Tumpa mboroaiu etei co. ⁹ Tumpa ombou Tai jae vaeño ivi pe ñande ñanoi vaera tecove opa mbae vae Tai oyapo ñandeve vae jeco pegua. Jare jocorai Tumpa oicuaucha ñandeve ñanderaiu co. ¹⁰ Jae rambue yaicuaa ma mboroaiu añetete vae. Echa tenonde yave ñande mbaeti yaaiu Tumpa. Erei Tumpa ñanderaiu jare ombou Tai ivi pe, jae oiporara vaera ñanembaeyoa reta re, aguiye vaera Tumpa pochi ñandeve.

¹¹ Cherivi reta, Tumpa ñanderaiu yae. Jae rambue jae oipota yayoaiu vaera. ¹² Mbaeti etei quia oecha Tumpa. Erei yayoaiu yave, Tumpa oico ñandepia pe, jare mboroaiu Tumpa coti ñanoi vae jecuae ocuacuaa.

¹³ Jare Tumpa omee ma ñandeve iEspíritu. Jae rambue yaicuaa ñande ñañemoiru co Tumpa ndive, jare Tumpa oico ñandepia pe. ¹⁴ Ore roecha Tumpa Tai, jare romombeu iru vae reta pe quirai ñandeRu

Tumpa ombou Tai ivi pe omboasa vaera ivi pegua reta. ¹⁵ Oime yave quia, Jesús co jae Tumpa Tai, jei vae, jae oñemoiru Tumpa ndive, jare Tumpa oico ipia pe. ¹⁶ Yaicuua Tumpa ñanderaiu co jare yarovia jecuae ñanderaiu co. Tumpa mboroaiau etei co. Jare oporoaiau reve oico vae oñemoiru Tumpa ndive, jare Tumpa oico ipia pe.

¹⁷ Jare ñañemoiru Tumpa ndive rambue, mboroaiau Tumpa coti ñanoi vae ocuacuaa, ñandepuere vaera ñai Tumpa jóvai yaquiyе mbae reve jocuae ara ñaneraa yave. Echa cuae ivi pe yaico rambueve, Tumpa oico ñandepia pe. ¹⁸ Ngaraa yaquiyе Tumpa güi, jae ñanderaiau rambue. Tumpa iporoaiau tuicha yae. Jae rambue ngaraa yaquiyе chugüi. Echa oime yave quia Tumpa güi oquiyе vae, jae oñemongueta Tumpa oiporaraucata co chupe. Tumpa güi oquiyе vae mbaeti oicuua Tumpa oaiu yae co.

¹⁹ Ñande yaaiau Tumpa jae rani ñanderaiau rambue. ²⁰ Oime yave quia, Che aaiau Tumpa, jei vae, omotarei yave iru oporogüirovia vae, iyapu co. Echa mbaeti oaiu iru oporogüirovia vae, yepe tei ipuere oecha. Jae rambue mbaeti ipuere oaiu Tumpa. Echa mbaeti etei oecha Tumpa. ²¹ Jare Tumpa omombeu ma ñandeve cuae mborooćuai: Oaiu Tumpa vae toaiu vi iru oporogüirovia vae.

5

Quirai yaicuua Tumpa tai reta

¹ Opaete güirovia Jesús co jae Cristo vae reta güinoi tecove opa mbae vae Tumpa güi. Jare oaiu ñandeRu Tumpa vae oaiu vi Tumpa tai reta. ² Yaaiau

yave Tumpa jare yayapo yave Tumpa iporoócuai reta, yaicuaa yaaíu co Tumpa tai reta. ³ Echa yaaíu yave Tumpa, yayapo iporoócuai reta, jare mbaeti co yavai yayapo vaera iporoócuai reta. ⁴ Tecove opa mbae vae Tumpa güi güinoi vae omoamiri ivi pegua oyovaicho jae ndive vae. Añete co, ñandepuere ñamoamiri ivi pegua oyovaicho ñande ndive vae ñandeporogüirovia rupi. ⁵ Güirovia Jesús co jae Tumpa Tai vae ipuere omoamiri ivi pegua oyovaicho jae ndive vae.

Espíritu Santo omombeu vae

⁶ Jesús omboipi iparavíqui oñembobautiza ca i pe yave, jare opa oyapo iparavíqui omano curusu re yave. Mbaeti jaeño omboipi iparavíqui. Opa oyapo omano curusu re yave. Jare Espíritu Santo omombeu cuae regua. Echa Espíritu Santo jecuaeño omombeu añete vae. ⁷ Jare oime ara pe mboapi cuae regua omombeu vae. Echa ñandeRu Tumpa jare Ñee jare Espíritu Santo omombeu pave. Jare cuae mboapi meteiño co. ⁸ Jae ramiño vi oime ivi pe mboapi cuae regua omombeu vae. Echa Espíritu Santo jare i jare Jesús jugüi omombeu pave metei ramiño. ⁹ Yarovia ivi pegua reta omombeu ñandeve vae, yepe tei amo pe omombeu ñandeve vae mbaeti co añete vae. Ereí Tumpa omombeu ñandeve vae jecuaeño añete vae. Jae rambue jecuaeño ñandepuere yarovia Tumpa omombeu ñandeve vae. Jare jae omombeu ñandeve Jesús regua corai: Cuae co jae cheRai. ¹⁰ Tumpa Tai re güirovia vae oicuaa ipia pe Jesús co jae Tumpa Tai. Jare Tumpa etei omombeu ñandeve cuae. Jae rambue cuae mbaeti güirovia vae mbaeti güirovia

Tumpa. Erei cuae mbaeti yave añete, Tumpa iyaputa tei co ñandeve. ¹¹ Jare Tumpa omombeu ñandeve cuae: Jae omeo ñandeve tecove opa mbae vae. Oime ñanoi cuae tecove opa mbae vae Tumpa Tai re yarovia rambue. ¹² Tumpa Tai güinoi ipia pe vae oime güinoi tecove opa mbae vae. Tumpa Tai mbaeti güinoi ipia pe vae mbaeti güinoi tecove opa mbae vae.

Peicuaa penoi co tecove opa mbae vae

¹³ Pe reta perovia Tumpa Tai jee re. Jae rambue aicuatía cuae peve peicuaa vaera penoi co tecove opa mbae vae. ¹⁴ Jare ñandepuere yarovia catu Tumpa. Echa yaicuaa Tumpa oendu co ñandeve yayerure yave chupe mbae jae oipota yayerure vaera chupe jese vae re. ¹⁵ Jare corai yayerure chupe mbae re yave, yaicuaa jae oyapota co ñandeyerure. Echa yaicuaa jae oendu co ñandeve.

¹⁶ Metei oporogüirovia vae oyapo yave mbaeyoa, iru oporogüirovia vae ipuere oyerure Tumpa pe mbaeyoa oyapo vae re, jocuae mbaeyoa mbaeti yave mano pegua. Jocorai yave, Tumpa omaeñota mbaeyoa oyapo vae re jecuae oico vaera. Oime co metei mbaeyoa mano pegua. Metei oporogüirovia vae oyapo yave jocuae nunga mbaeyoa, iru oporogüirovia vae agüiye toyerure Tumpa pe jese. ¹⁷ Opaete mbae jupi mbae vae mbaeyoa co. Erei oime mbaeyoa mbaeti mano pegua vae.

¹⁸ Yaicuaa tecove opa mbae vae Tumpa güi güinoi vae mbaeti jecuaeño oyapo mbaeyoa. Echa Tumpa Tai etei oñangareco jese agüiye vaera aña guasu oipii.

19 Yaicuaa ñande co jae Tumpa tai reta jare quirai aña guasu güinoi mbaepuere opaete oporogüirovia mbae vae reta re.

20 Jae ramiño vi yaicuaa Tumpa Tai ou ma co cuae ivi pe jare omee ñandeve yaicuaa vaera Tumpa añetete vae. Ñañemoiru ma Tumpa ndive. Echa ñañemoiru ma Tumpa Tai Jesucristo ndive. Jae co Tumpa añetete vae. Jae omee ñandeve tecove opa mbae vae.

21 Cheraí reta, agüiye pemboete mbae Tumpa jecovia pe. Amén.

**Nuevo Testamento Guaraní Pe
New Testament in Guaraní, Eastern Bolivian
(BL:gui:Guaraní, Eastern Bolivian)**

copyright © 2012 Wycliffe Bible Translators, Inc.

Language: Guaraní, Eastern Bolivian

Translation by: Wycliffe Bible Translators, Inc.

Guaraní, Eastern Bolivian [gui], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Eastern Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

577acc2d-2f51-5700-8a70-613f34a2faba